

Supervizor Gregorian pohvalio rad Javnog komunalnog preduzeća Distrikta Brčko



Supervizor za Brčko dr Raffi Gregorian izrazio je zadovoljstvo rezultatima dosadašnjeg rada koje je ostvarilo Javno komunalno preduzeće Distrikta Brčko, nakon što je danas posjetio prostorije preduzeća i sastao se sa direktorom gđinom Admirom Nukovićem i predsjednikom Upravnog odbora gđinom Petrom Domićem.

“Izvještaji ukazuju da su se komunalne usluge u Distriktu Brčko u svim oblastima rada značajno poboljšale od kada je preduzeće počelo sa radom 01.01.2008. što nam potvrđuje odluku kojom su komunalne djelatnosti reorganizovane u oblik javnog preduzeća” rekao je supervizor Gregorian. “Iako preduzeće postoji tek nekoliko mjeseci stanovnici Brčkog su počeli da primaju bolje usluge što i predstavlja krajnji cilj ovog projekta. Možemo očekivati da će rezultati postati još bolji kad se sistem u potpunosti razvije u narednim mjesecima”.

Supervizor je istakao potrebu za bližom saradnjom između Javnog komunalnog preduzeća i Vlade Distrikta Brčko naročito u vezi sa pitanjima poput nejasne podjele odgovornosti između preduzeća i Vlade u vezi sa sprovođenjem kapitalnih projekata, nepostojanjem različitih pravnih i administrativnih procedura i nagomilanih dugova iz proteklih nekoliko godina zbog neplaćenih računa za struju i vodu.

Kada je u pitanju naplata neplaćenih računa za komunalne usluge, supervizor Gregorian je izrazio podršku združenim nastojanjima preduzeća i Vlade, koja su u toku, da se razvije program subvencioniranja komunalnih računa za socijalno ugrožene kategorije.